



Djela koja iskupljuju grijeh (Medina)

Hatib: dr. Abdulbari ibn Avad es-Subejti

15. zul-hidže 1443. po Hidžri / 15. juli 2022.

Allahu pripada najveća, najljepša i najblagoslovljenija hvala i zahvalnost. Hvala Mu onoliko koliko je stvorenja na nebesima i onoliko koliko ih je na Zemlji, i koliko je između njih. Svjedočim da nema boga osim Allaha, jedinog, Koji nema druga, i svjedočim da je naš prvak i vjerovjesnik Muhammed, sallallahu alejhi ve sellem, Njegov rob i poslanik, neka su na njega Allahov blagoslov, mir i spas, i na njegovu porodicu i ashabe. Oporučujem sebi i vama bogobožnost.

Završeni su obredi hadža, i hodočasnici su polako počeli spremati svoje kofere, u namjeri povratka svojim kućama, nakon uspješne sezone hadža, koju je i ove godine obilježila izvanredna organizacija, sa svim mogućim uslugama i pogodnostima, a u kojoj su učesce uzele sve strukture vlasti, ulažući ogromne napore i koristeći se najmodernijim dostignućima u hizmetu hadžijama i posjetiocima. Allah, džellešānuhu, počastio nas je sezonama dobrih i pobožnih djela, čije se dobrote smjenjuju jedna za drugom i u kojima se na nas spuštaju Allahovi blagoslovi i milost. Među onima koje je Allah uputio, molimo Ga da budemo od njih, ima onih koji će se vratiti s hadža oproštenih grijeha kao na dan kada su ih njihove majke rodile, a nekima će biti oprošteni grijesi počinjeni u dvije godine, prethodnoj i narednoj. Kontinuitet u oslobađanju od grijeha i čišćenju stranica dobrih djela ne prekida se završetkom sezone hadža i nije ograničen na neko posebno mjesto ili vrijeme. I zbog toga musliman neprestano traga za djelima kojima će iskupiti svoje grijeh, i podići stepen kod Allaha, a sve u cilju čišćenja duše koja stremlji ka visinama i čistoti. Jedno od najuzvišenijih i najvrednijih djela kojima se iskupljuju grijesi jeste tevhid, vjerovanje u Allahovu jednoću i obožavanje samo Njega, a ne nekoga ili nečega drugog. Grijesi se iskupljuju i pripremanjem opskrbe u vidu bogobožnosti, koja je





najbolja opskrba. Uzvišeni kaže: “A onome ko se bude Allaha bojao – On će preko ružnih postupaka njegovih preći i još mu veliku nagradu dati.” (Et-Talak, 5)

Također, sva dobra djela iskupljuju grijeh, a od tih djela su: upotpunjavanje abdesta i čistoće, obavljanje namaza u njegovom vremenu u džematu. Poslanik, sallallahu alejhi ve sellem, rekao je: “Hoćete li da vas uputim na ono čime Allah briše grijeh i podiže stepene?” “Da”, rekoše prisutni, a Poslanik, sallallahu alejhi ve sellem, tada reče: “Upotpunjavanje abdesta u teškim uvjetima i situacijama, mnoštvo koraka prema džamiji i iščekivanje namaza nakon namaza. To je bdijenje na Allahovom putu. To je bdijenje na Allahovom putu.” Poslanik, sallallahu alejhi ve sellem, također je rekao: “Ko se abdesti u svojoj kući, a zatim ode u jednu od Allahovih kuća, kako bi obavio propisani namaz, jednim korakom bit će mu oprostjen grijeh, a drugim podignuta deredža.” (Muslim)

Jedan od uzroka iskupljenja grijeha i podizanja deredža jeste trošenje imetka, njegovo dijeljenje na Božijem putu i sadaka. Uzvišeni kaže: “Lijepo je kada javno dajete milostinju, ali je za vas bolje da je dajete siromasima kad niko ne vidi, i On će preći preko nekih vaših hrđavih postupaka.” (El-Bekara, 271)

Iskupljenje grijeha i podizanje deredža postiže se i pozivanjem da se čini dobro i odvraćanjem od zla. Poslanik, sallallahu alejhi ve sellem, rekao je: “Iskušenja (smutnje) koja čovjeka pogađaju u njegovoj porodici, imetku i s komšijama iskupljuju namaz, sadaka, navraćanje na dobro i odvraćanje od zla.” (Buhari i Muslim) Iskrenost prema sobi i prema Allahu, i iskrenost u životu jedan je od uzroka iskupljenja grijeha i podizanja deredža. Uzvišeni kaže: “A onaj koji donosi istinu i oni koji u nju vjeruju, oni su bogobojazni, sve što zažele u Gospodara svoga će naći; to će biti nagrada onima koji su dobra djela činili, da bi Allah preko ružnih postupaka njihovih prešao, i da bi ih za lijepa djela koja su radili nagradio.” (Ez-Zumer, 33–35) Grijeh, također, iskupljuju: postojanost u vjerovanju u trenucima iskušenja; unapređenje uvjeta života i kultivisanje zemlje i požrtvovanost u činjenju dobra ljudima. Poslanik, sallallahu





alejhi ve sellem, rekao je: "Dok je čovjek išao putem, naišao je na trnovitu granu, pa ju je sklonio i Allah mu je zahvalio i oprostio grijeh." (Buhari i Muslim)

Ispunjen radošću zbog prilike da čini dobra djela u ovim odabranim danima, musliman moli i traži od Allaha, džellešanuhu, da mu podari uputu i ustrajnost i uči dovu koju je učio Poslanik, sallallahu alejhi ve sellem: "Allahumme inni es'elukes-sebate fil emr vel-azimete aler-rušd! – Allahu moj, molim Te da mi podariš ustrajnost u vjeri i odlučnost u razboritosti!", i uči: "Ja mukallibel-kulubi sebbit kalbi ala dinik! – O Ti koji okrećeš srca, učvrsti moje srce u Svojoj vjeri!"

Spominjanje Allaha – zikrullah donosi mnogobrojne koristi i otvara vrata Allahove milosti. S malo riječi, u kratkom vremenskom roku i s iskrenim nijetom iskupljuju se grijesi i musliman postiže najveće deredže. Poslanik, sallallahu alejhi ve sellem, rekao je: "Ko u jednom danu sto puta kaže: 'La ilahe illallah vahdehu la šerike leh lehul-mulku ve lehul-hamdu ve huve ala kulli šej'in kadir!', imat će nagradu kao da je oslobodio deset robova, i bit će mu upisano stotinu dobrih djela, a obrisano stotinu grijeha i to će mu biti zaštita od šejtana cijeli taj dan sve dok ne omrkne, i niko neće imati veću nagradu od njega osim onaj ko više puta od njega izgovori ove riječi." (Buhari i Muslim)

"Ko nakon što čuje ezan kaže: 'Ešhedu en la ilahe illallah ve ešhedu enne Muhammeden abduhu ve resuluhu, reditu billahi rabba ve bi muhammedin resula ve bil-islami dina!', bit će mu oprosteni grijesi." (Muslim)

"Ko u jednom danu sto puta kaže: 'Subhanallahi ve bi hamdihi!', bit će mu oprosteni grijesi, makar ih bilo poput morske pjene." (Buhari i Muslim)

Ovo je samo kap iz riznica Allahovog dobra i milosti, a sretan je onaj ko prihvati darove Plemenitog.

"Naš Uzvišeni Gospodar pruža Svoju ruku noću da se pokaje onaj koji je griješio danju, i pruža Svoju ruku danju da se pokaje onaj koji je griješio noću i tako će biti sve dok sunce ne izađe na zapadu." (Muslim)





"KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJE
KOJU TOKOM HUTBE ELABORIRA." (PREPOROD)

HUTBE 

O vjernici, donosite salavate na poslanika Pravog puta, to vam je naredba od vašeg Gospodara u časnoj Knjizi: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

